

焦太史編輯國朝獻徵錄

焦太史編輯國朝獻徵錄卷之一百十一目錄

各銜

周顯

楊廣

宋瑄

盧振

崇剛

崇一作鄧

小馬王

張倫

王資

孫繼

姚鎮

王玉

陳聞

于先

凌鉤

朱顯忠

郭雲

楊信

徐義

趙諒

柴英

倪諒

劉蒼

王業

劉伏玘

徐讓

衛健

四明趙昌期

全校

吳興茅元儀

錢塘徐象楨

刊行

目錄終

焦太史編輯國朝獻徵錄卷之一百十一

各衛

驍騎前衛指揮使周顯傳

周顯合肥人歲乙未上駐師和州顯自黃山來附
六月翊從渡江拔采石取太平充帶刀先鋒克溧水
句容溧陽丙申二月破中丞水寨三月禱陳兆先營
克南臺鎮江四月下金壇丁酉三月取常州橫林樂
杜等處四月克宣州六月收江陰營於甘露征常熟
興張士誠戰於望亭又擊敗陳保兒陞前部先鋒戊
戌二月隨邵平章征湖州十一月從克婺州己亥正

月克諸暨九月援常州陞帳前都先鋒庚子五月於
龍灣石灰山敗陳友諒兵追至采石遂復太平辛丑
十一月從援長興敗李將軍癸卯三月張士誠將呂
珍盛兵寇安豐上親援之顯從行擊走珍七月戰
鄱陽湖甲辰平武昌回克廬州乙巳五月取安陸襄
陽等處平章常遇春上其功陞驍騎衛千戶十一月
克秦州丙午八月從征浙西十月克舊館十一月克
湖州元年九月從破蘓州擒士誠陞金吾右衛指揮
同知十月從征中原洪武元年正月從棗州尋援之
三月克汴梁四月克河南府時上以汴梁爲比京

五月親往巡狩回軍扈從七月督指揮曹與才攻取
泉白寨又於汝州攻破毛葫蘆劉參政營調策應陝
州十一月征探潞村至聞喜梅右丞逆戰顯手刃之
十二月奉檄總領兵邏絳州路遂克河中二年二月
改驍騎前衛指揮同知征迤北四月從常遇春至錦
川追江文清六月至全寧追也速於北黃河克上都
八月從李文忠援大同九月克馬邑進抵梅峪口敗
脫列伯軍獲樞密知院王文質馬飛卿等逐孔興至
東勝州而還三年正月復從征沙漠二月克察罕腦
兒三月抵駱駝山收朵兒只平章塞進取上都五月

北克應昌府從左丞趙庸追蠻子大尉擒僞平章伯
荅兒等復追江國公軍馬降之六月克虹螺山陞昭
勇將軍驍騎前衛指揮使四年復從文忠北征六月
進兵阿魯渾河與虜戰沒

河州衛指揮使楊廣傳

楊廣巢縣人初事雙刀趙爲元帥以智勇兩歲丁酉四月宣州歸附授左翼元帥副使十一月從總兵徐達攻池州樅陽窘雙刀趙俘其兵戊戌十月克復宜興先是宜興復叛上命達率師討之未下至是達遣兵絕其餉道帥廣等併力攻城遂拔之十二月從下婺州己亥正月克諸暨攻紹興還婺九月取衢州庚子正月攻高郵月城先登辛丑四月策應濠州八月江州旣破陳友諒走武昌壬寅正月遂下洪都留守禦癸卯六月攻吉安甲辰武昌平從討熊天瑞於

贛州乙巳正月天瑞降南雄韶州亦附丙午征進湖南益陽三月陞英武衛管軍千戶八月諸將伐張士誠廣乘海舟取湖州十一月合圍蘇州明年九月城破士誠就擒論功賜綵段超遷鷹揚衛指揮使十一月取沂州益都十二月東伐萊陽洪武元年正月克之四月克河南路擣潼關六月賜蒞階昭勇將軍渡河與僞官楊呂二平章大戰賊衆奔潰獲馬數十是冬攻漢中二年三月克鹿臺鳳翔四月克鞏昌守禦十月畧西番授臨洮渡河擊番寇敗去未幾奉旨開設鞏昌衛三年授世襲誥仍昭勇將軍四月襲王保

保軍於定西破之夷其營落五月征鐵石岷州回衛
九月復奉旨統領官軍開設秦州衛四年四月隨賴
川侯傅友德克蜀階州文州援漢中進克成都援崇
慶承曹國公李文忠剗開設永寧衛守禦八年九月
詔領兵馬赴京調驍騎左衛九年正月隨徐大傅北
營於薊州五月師還十年改河州左衛指揮使誥進
昭武將軍設衛守禦十二年率所部隨西平侯沐英
征洮州十八族番賤三副使穎膝子等禽斬甚衆復
於故城遇賊與戰中矢傷左脇尋卒訃聞上爲之
惻然勅有司歸其柩所過郡邑致祭賜葬于巢之柘

奉命詞臣撰碑銘以昭勲節祖暹春贈懷遠大將軍
親軍指揮同知輕車都尉追封弘農郡侯父興旺追
封弘農郡侯祖母李氏母柳氏妻張氏俱封弘農郡
夫人子潮初充叅侍改散騎舍人十二年征西有功
襲典武衛指揮使十四年隨徐太傅討松州旋師北
平卽從傅穎侯征雲南克普定羅具砦盤江普安曲
靖禽司徒平章達里麻攻烏撒元左丞實卜合芒部
土酋率衆迎戰擊敗之遂領本衛官軍城烏撒克霑
益十五年二月剗雲南大佛龍海等砦四月同馮張
兩都督策應大軍於金沙江及東川又從穎侯追東

川寇至勝石上宮渡楊柳江八月大破阿吉魯等山
砦追寶卜十二月援大理克佛光砦十六年討古州
龍里洞砦又明年從宋國公北平操練二十一年卒
孫海襲本衛指揮使永樂初調建陽衛征交征紅州
等處有功孫輔曾孫清玄孫雲雲子光世襲建陽衛
指揮使光子來

府軍右衛指揮使宋瑄

忠節錄

宋瑄鄆國忠順公晟之長子建文中為府軍右衛指揮使數從諸將禦北兵有功戰于靈璧瑄披甲躍馬先登斬首數級已而諸營兵敗瑄猶格鬪力盡死之靖難後晟功名大著封西寧侯永樂中兵部上列侯子孫名乞嗣封瑄子本晟長孫富嗣 文皇惡瑄以瑄弟琥嗣之

燕山護衛指揮盧振

忠節錄

盧振燕護衛指揮 文皇將起兵建文君逮燕官校
令曷貴密約振爲內應曷貴既見殺振不屈死之

揚州衛指揮崇剛

忠節錄

忠節錄

崇剛揚州衛指揮沉鷲有膽略靖難兵起剛練兵繕
濬城濠御史王彬倚任之兵至專以城守事屬剛晝
夜不解甲他有欲迎降者忌剛然畏彬不敢發及彬
為張本徐政所縛開門降並縛剛剛不屈而死

獻徵錄

卷之二十一

八

指揮小馬王

忠節錄

王失其名每騎一小馬人遂名爲小馬王指揮臨淮人太祖朝功臣之子靖難師起調從李景隆行與北兵戰于白溝河敗績脫胄付其僕曰吾爲國死以此報家人乃慨然立馬豎鎗而亡

河北指揮張倫

忠節錄

張倫不知何許人河北諸衛指揮也勇悍負氣嘗喜
觀古昔忠義事建文初薊州衛官起兵攻北平不克
死倫發憤合兩衛官率兵南奔結盟報國初從李景
隆已而從盛庸並有功靖難後招倫降倫笑曰張倫
將自賣爲丁公乎死之

指揮王資

忠節錄

王資不知所自起以指揮從偏將防守淮北有努力
善騎射遠望之役率步卒護軍餉諸將兵敗資被執
遣還京復走鳳陽從徐知府防禦靖難後追罪資不
屈死之

昭勇將軍直隸潼關衛指揮使孫公鑑墓碑

王九思

昭勇將軍孫公者諱鑑字克明其先山東淄川人徙
鄒平乃遂爲鄒平縣人其七世祖福金未備盜鄉邑
有功而元興授銀符爲軍民千戶以收河南功當調
而鄉人愛之留爲鄒平縣云福四子而長子希武裝
爲千戶授金符守備睢州後征海州不幸中流矢死
希武六子其仲子惟方惟方二子其長子曰本當是
時元末天下亂羣雄並起高皇帝提兵驅逐胡虜
而本以壯士歸附耕籍濟南迨寇金山下戰死其弟

孫智代之智亦戰金山死而其弟雄復代之隸燕山
右護衛洪武三十年 文皇帝靖內難雄爲前鋒攻
懷來雄縣漢州取之陞小旗又取大寧鄭村塢敗齊
泰軍進爲總旗取蔚州攻圍大同大戰白溝河招募
忠勇千二百人陞武功中衛左所副千戶又克滄州
戰夾河棗城勝之收捕開州叛民若干人獲哨馬數
千匹陞正千戶又攻東阿東平汶上克之而南攻靈
璧破大軍克泗州渡江克金川門有功陞羽林右衛
指揮使 文皇帝平定海內而雄扈從而北又北擊
達賊木鴨失里阿魯反瓦剌是時關中無事而襟喉

在潼關不可無人。帝獨深念之。一日熟視雄而曰：舍雄無可守潼關者。雄頓首謝曰：臣起自行伍，效犬馬微勞，賴陛下恩德超拔至此。今幸且備宿衛，近日月之光，老死輦轂下，無所復恨。奈何棄之於遠地乎？帝笑曰：毋說遠。吾以汝爲萬里長城也。行且召汝矣。第往，毋苦。于是乘傳至關，而孫氏之隸潼關也。蓋自雄始也。雄以天子心腹，臣受命當要路，又智勇絕人者，以此名動關中。雄生子真，真配劉氏生一子，是爲昭勇將軍孫公者也。公生五月而父卒，又三年而共祖雄亦老病卒。又二十一年而公始襲共祖。

職指揮使云潼關衛自其祖雄爲指揮使有名其他
爲指揮皆以門閥繼嗣齷齪備員而已無所能發明
功名有著于當世者公乃奮勵感激歎息曰嗟乎我
不視吾祖死卽何面目見之地下乎又曰人身惟目
最清外物毫忽不可入居官處已者當如是足矣于
是攻苦食淡而捕盜盜息司門門嚴涖城操城操嚴
甘肅備胡備胡有功典衛政衛政舉士卒服當道稱
焉而又故孫氏也于是諸指揮者咸辟自以爲弗及
也然此而人但知其廉克舉其職無忝于其祖而已
矣至於誦習經籍鼓琴或有未知也至于痛其父之

早逝以孝于其母也母病額天以身代死母死而哀
毀幾亦死者則無弗知之者蓋嘗詰贈其父昭勇將
軍指揮使封其母太淑人而所以養太淑人者又甚
至然猶若此此可不謂之能孝者乎然共爲人剛直
有氣者事不如意輒怒卽無所發怒卽數日鬱鬱不
識竟由此病人或勸之乃愈益怒病至是病革召其
子廉執其手而口吾爲指揮使無媿吾祖我死汝宜
爲指揮使汝爲指揮使必思吾所以無媿其祖者曷
之哉廉泣而應曰不敢忘乃遂不起其年成化壬辰
五月十七日也壽僅五十歲

潼關衛指揮使姚公鎮墓志銘 韓邦奇

公諱鎮字公鼎號王岡姚氏之先古河中府六管村人村今隸蒲州相傳系出舜公族今其村有舜祠族人歲時享祀幾世祖魁中元至正戊子鄉試官淮安府桃源縣學教諭既謝事聞河中大荒卜築揚州府興化縣遂爲興化人桃源公與里沙善人交好里人仰重桃源善人名其地爲挑沙庄云桃源子庸至辛丑進士歷官永平知府進階右叅議永平公子五庚一庚二庚三庚四庚五我 太祖高皇帝龍飛五庚仗劍從屢立戰功庚一公隄雲南瀾滄衛指揮同知

庚二公遼東鐵嶺衛指揮使庚三公直隸潁上守禦
千戶所正千戶庚四公以小旗從 文皇至北平護
衛寔公啟建祖也庚五公韓府公護衛小旗庚四公
生倫爲公高祖補小旗陞總旗總旗生厚陞薊州衛
百戶從 文皇征北虜因留北平洪武三十二年

文皇靖內難百戶領兵克雄縣景州真定陞副千戶
策應永平攻夾溝大寧戰鄭村埧勝之三十二年戰
白溝河攻濟南陞正千戶克滄州陞薊州衛指揮使
事大戰六 丁之扈蹕還北平三十四年二月 文
皇自將南下僉事爲前鋒戰夾河葦城大捷進懷遠

將軍指揮同知三十五年克來阿戰肥河大店靈壁
克泗州渡淮 文皇入正大統論功蒙綵段襲衣白
金之賜進昭勇將軍指揮使初 文皇既舉兵平都
司力抗王師不能進然天下素畏 文皇英武乃選
貌若已者十人金甲名馬各帥兵突出平軍望見大
驚潰十人者昭勇其一也永樂改元之明年 上以
潼關中原要地調掌衛事命每歲正旦入朝而以衛
直隸右府賜襲衣文幣以符驗授之許乘傳往來是
年冬秦王入朝夜至關左右呼門甚急昭勇曰朝廷
禁門深夜不得啟也王怒止關外至京面 上垂泣

曰潼關姚指揮慢朝廷甚夜不容臣入關 上但微
笑旬日正旦昭勇來朝 上問秦王不得入關事奏
曰潼關國家重地也臣止知 陛下非知秦王 上
顧左右曰如姚指揮真鎖鑰之臣賜寶鈔明年 上
將北幸值昭勇來朝勅還鎮奸細撒伏臘假僧過關
緝獲斬之後聞言官交論不當先誅奸細者 上曰
言官論是但卽斬奸細則指揮軍威大振指揮處亦
是也會按西部事得當 上甚悅十八年四月辛
上悼惜之遣官祭昭勇生深築指揮使功陞都指揮
同知宣德中鎮守寧夏北虜大舉入寇鎮守負流矢

大戰斬獲甚衆捷聞賜錦衣白金名馬奏建潼關衛
學鎮守生琮襲指揮使掌衛事配李淑人生公貌偉
氣清讀書好古太保劉公見而愛之妻以仲女是所
稱劉太淑人也新都楊公椿督學湖廣過關公謁場
旅邸楊謂其子廷和曰是兒英年美質他日佳士也
可與交遊廷和者世所稱石齋先生也少師大學士
自是金蘭縉紳聲譽自洽云會送姑適陝西左布政
孫公得奇疾卒于長安先一日見緋衣白馬使音曰
使君有請不可久稽也明日雷雨大作公歸矣後以
子諫官贈昭勇將軍指揮使

金華衛指揮副使王玉傳

第 四

王玉梁縣人歲壬辰太祖起兵於濠玉與弟瑛來歸留帳下玉剛勇有謀終家山寨兵勁悍首攻夷之再蹂黃墩蕩湖口賊莫敢當其鋒授千夫長時彭祖倡妖術聚衆萬餘玉擊之剗其砦甲午取滁州乙未正月取和州敗青山兵從擊鷄籠山羣盜以功授萬夫長六月翊從渡江奪采石舉太平陳也先控水陸兵寇城下上親禦之命玉東收溧陽溧水攻宣州丙申破水陸二砦克臺城復南徐陞右副元帥從徐達攻常州張士誠弟士德來援玉戰敗之士德走玉

遣男虎子追擒之。上大喜，大被賞。齊丁酉三月，常州平，遂擊常熟。戊戌二月，克嚴陵，降溪洞兵，留戍焉。十二月，下金華。己亥二月，拔諸暨，戰臨海，撤蕭山。是年九月，克三衢，遂鎮其地。辛丑六月，陳友諒僞平章李明道領兵五萬圍廣信。胡大海帥玉率兵援之。玉從殺敗賊衆，就障手俘明道，送至京。上喜，卽授明道以官，因得友諒之虛實，命爲鄉導，以取江西。克江州，下南昌，降饒州、吉安等郡。玉之功，于是爲大。壬寅三月，玉自廣信徵入朝，有祝宗、南昌之亂，瑛提其師討平之。玉還金華，謝再興。叛甲辰六月，再興犯義烏。

東陽爲瑛所擊敗七月 上命瑛統玉兵爲金華衛
指揮副使

王瑛字君寶玉之弟也 上起兵於濠玉與瑛來歸
上嘉其誠俱留衛帳下玉由千夫長陞萬夫長歷陞
副元帥其夷繆家山蹂黃墩蕩湖口剗彭祖寨取滁
和兩州奪采石舉太平破溧陽溧水克宣城臺城覆
南徐擒毗陵擊常熟擒張士德戍嚴陵下金華拔諸
暨戰臨浦掀蕭山鎮三衢擣廣信俘李明道雖曰善
陣善戰以濟厥勲亦以瑛常左右以資羽翼相爲倚
角也玉自廣信入朝瑛提其師從平章鄧公復臨川

援南昌玉還金華謝再興犯義烏東陽瑛力戰卻之
援千夫長玉卒廷議以瑛久在兵間聲望素著立命
統其衆加領兵官明年二月張士誠侵我新城從平
章李公出戰舞鰲衝其中堅賊大敗橫屍蔽野委棄
資仗舉之數日不盡受上賞因與元帥何世明攻鉛
山捷于紫溪遂從叅軍胡公進攻浦城陣于古秋橋
于西陽嶺於景江橋於南峯寺大小之戰數十斬首
二千餘級虜將校五十餘人降卒八百餘人又明年
從李公取桐廬富陽餘杭遂入錢塘又明年陞指揮
副使洪武改元之春李公移兵建寧延平拔英以從

就命撫安汀州還從胡左丞捕寇海中踰秀山殲之
分兵畧將樂朝天明溪白雲虎頭黃龍青龍等砦悉
降其衆二年加明威將軍從李公北征行至通州病
內熱平章鄂國常公俾舁歸金華就醫藥六月七日
歿于毘陵年三十五 上聞而悼之命賜衣廩土田
存恤其家

成都右衛指揮同知陳聞傳

陳聞合肥人元末爲義兵千戶歲乙未六月太祖
渡江克太平遂率衆歸附授太平興國翼元帥府劄
付充管軍千戶克溧水敗左侍御軍馬七月從總兵
湯大夫劉總管克句容八月從克溧陽丙申二月取
采石二月克陳也先營進取南臺克鎮江五月征宣
州七月從徐大將軍攻常州丁酉三月破其城四月
從陳兆先取寧國縣擊敗宣州援兵六月克江陰州
八月克新安戊戌二月從攻湖州擊天目山等寨十
月從兆先策應宜興十二月克婺州明年正月從兆

先克諸暨尋取紹興十月克衢州庚子正月辛丑八月同兆先征安慶尋拔江州調守龍江十一月從援長興明年三月置編伍以兆先薦授管軍百戶九月修築安慶城池癸卯十月從征武昌甲辰二月下武昌陞管軍千戶九月取荊州丙午八月移戍歸州洪武三年七月僞夏來攻聞出兵奮擊大敗賊衆九年移守德安十一年八月陞成都衛指揮僉事十二年梁山大小竹等處賊人叛亂奉調統官軍討之殺獲首級一百餘顆生擒五百人抵墊江高灘洞殺賊擊散之遂攻滅梁山龍馬槽寨平大小竹縣賊七月修治城

池十四年十月從胡郭二都督征雲南十一月駐赤水河擊散大水腦通化等蠻十五年二月攻龍海寨三月從征建昌論征南功陞成都右衛指揮同知與世襲二十四年致仕子瑄襲本衛指揮同知累以平蠻功陞四川都指揮同知進都督封平江伯卒封平江侯

懷遠將軍同知鷹揚衛親軍指揮使司事于君

光墓志銘

宋 濂

惟于氏遠有世序多以文學爲業族居南康之都昌
至君益顯融於時大父德仲贈明威將軍某衛親軍
指揮使司副使上騎都尉追封河南郡伯大母王氏
追封河南郡君父祥英贈懷遠大將軍同知鷹揚衛
親軍指揮使司事輕車都尉追封河南郡侯母余妙
真封河南郡太夫人君幼知讀書通大義縉紳先生
稱之旣長磊落有大志會元政大亂天下兵動江東
西化爲盜區分寧徐壽輝建僞號曰宋都九江使其

將張福夏彰據湖口元將三旦八駐師壽陽都昌連
當其衝要交互殺掠民俵俵不知所從君召父老子
弟謂曰吾等皆良民順寇兵官軍以爲叛從官軍則
寇兵又將屠我行見無噍類矣其計安出父老子弟
咸叩頭曰微君不能生我君乃集諸少年趨徙者列
爲隊伍朝暮教以擊刺之法旬月間整整可用乃握
劍坐庭中下令曰賊兵有人吾境共擊之不用命者
斬衆皆股栗賊聞不敢犯同列有忌君能者數潛通
構害君皆先機而梟其首人以爲神歲乙未徐兵破
鄱陽君之勢遂孤都昌繼陷徐聞君名急搜訪疫之

命爲江東宣慰元帥鎮鄱陽歲庚子徐之柄臣陳友諒殺徐而自立更僞號曰漢君乃泣曰我與陳皆君之臣不道乃爾我可北面而事之耶當是時皇上龍飛臨濠定鼎建業豪傑之士爭相奔走君遣使者奉幣以浮梁降 上大悅而受之君輕騎詣 上於龍江召宰臣燕饗之禮意優渥賜以金鷄頂帽暨錦袍一襲授通議大夫行樞密院判官戍徽州永平翼遣之鎮行十里所復趨還解金連環并緋授之且曰子賜卿冠衣不可少此故又召卿來爾君感知遇之深誓殫力報効上疏曰于光之心鞠躬盡力報曰一

忠死而後已。上命左右藏之曰：此于光誓書也。君察偽漢國政不一，兵出于外，潛獻搗虛之策。上親征九江，君與部將皆從。颺行電疾，友諒以爲自天而下，棄城宵遁。君將兵下黃梅，瑞目諸處亡何助攻建昌，拔之。出戍鄱陽，友諒攻洪都。上親往救，大戰彭蠡，湖友諒斃於流矢，其子埋假息。武目詔常忠武王追之，理遂與櫬銜璧出降。君皆在行中，與有功焉。轉同知振武衛親軍指揮使司事，遷鷹揚衛進階懷遠大將軍。徐魏公往討秦高郵，淮安安豐皆下之。張之勁卒皆聚湖之舊館，魏督諸將及君破之，遂平湖州。

下姑蘇士誠就擒及魏公征中原君統銳兵以從益都沂棣登萊諸州次第平乃入汴梁克洛陝攻下潼關君與郭將軍守之元將王左丞自河中帥衆來奪關兩兵方挾戰君舞戟橫貫其中大呼殺入元兵奔潰追斬之積尸盈野越六月追擊河中拔其城魏公命戍鞏昌元將擴廓帖木兒屢引兵來戰君輒敗走之遁兵不敢東向遂合諸部兵圍安定州君急分兵往救兵少不能戰退三十里復與元別軍會君腹背受攻遂被執百計誘其降不屈韓將軍戍蘭州元兵來圍城擁君行城下使誘將軍降君呼曰我不幸被

縛誓死不辱國爾輩受國厚恩當堅守以伺大軍之
至勿爲其甘言所誘也元兵大怒批其頰擁之使去
尋被害 上悼之賜以布帛令其家成服行喪遣祠
部官祭以少牢奉其主配享功臣廟中君諱光字大
用于其姓也自二十五歲起兵至四十三而沒氣貌
修整善鼓琴詩多古雅不凡兼通醫學針灸科人望
之翩然貴介公子也及持戟上馬鷹揚虎視所向不
敢當逢者莫不改容大夫人性剛嚴君事之孜孜盡
禮唯恐稍違其意遇有氣未平君長跼於前移時不
敢起君子尤稱之

懷遠將軍忠義前衛指揮同知凌公錦墓志銘

程敏政

公諱錦字日章凌姓凌之先蓋出衛康叔康叔支子
爲周凌人以官氏子孫散處江浙間至吳徧將軍都
亭侯統著名史冊而句容故吳句也句容之凌相傳
爲統後在唐學士準在宋侍郎策各以其地顯公家
句容之郭干村族亦鉅而失其譜公之祖福海妣田
氏考天壽贈懷遠將軍同知指揮使司事妣白氏贈
淑人天壽君永樂初以詿誤戍興州中屯業中北然
獨撫公曰吾所爲無媿心者將恃爾以亢吾宗無自

素也公受命感奮必思以自効宣德初代父軍中騎射之餘時從儒者問書史大義而於一切世態俛仰宦跡通滯物貨奇贏悉鉤探其情勢而欲手操之蓋公性沉鷲有術長身偉鬣慕古策士亦每以策干時名公卿諸公亦多折節與還往正統中從大將軍擣虜于甘州兀魯乃歸以功長伍什夫上言興州官軍當分番宿衛而地遠外非便兵部是之得旨許內徙隸忠義前衛己巳秋虜大入寇京城戒嚴公從副將軍戰虜彰義門大追虜紫荊關以功試百戶景泰初貴州苗作亂公在行破其香爐山諸寨進副千戶金

齒守將知其能請隨以自輔天順元年正月以遊奏
入京預迎 英廟復位進指揮同知食祿錦衣衛
英廟亦識其人數有賜齋詔乘傳取馴象於雲南還
奏稱旨久之曹石擅政陷文臣典兵者公坐與善調
涼川明年與邊將出禦虜敗之功未上值 英廟燕
間忽思公問所在左右曰在涼州即日召之時方革
迎駕功進者兵部俟公至上劾 英廟曰非也其仍
舊職不問公感 上知遇脫險卽夷遂獻其名馬廷
謝不復出以老疾自免日與方外者遊而於世故亦
未始相忘聞朝政闕失暨邊報民瘼與客疊疊說不

依自號無然子放遊江東西淮海間自豪于賈人十
餘年乃還買西山田三千畝以濟饑捐地以瘞貧死
者千計築大第作上室壘山種樹日坐卧其中雖事
聲色而所食無珍味所服不過唐巾弊衣自以爲得
異人授金丹訣恒自闕不以告人也又時操觚著書
以仙自命雖見哂不恤弘治壬子二月二十四日忽
得疾不起享年七十有九

指揮僉事朱顯忠傳

實錄

顯忠泰州如臯人初同兄貞事張士誠我師下松江
顯忠兄弟率部下來降吳元年授濠梁衛指揮僉事
後從御史大夫鄧愈下河州抵土蕃還守河州及從
穎川侯傅友德克交州遂留守之至是世貞誘合番
寇數萬來攻顯忠戰却之偽夏趙元帥復與世貞合
兵攻城城中食且盡外援不至部下皆曰與其陷死
地孰若出城求生路乎顯忠厲聲曰爲將守城城存
與存城亡與亡豈有求活將軍耶詰旦世貞攻圍益
急顯忠悉兵出東門拒戰而世貞復攻西門日且暮

顯忠被傷髮瘡決戰力不支城破爲亂兵所殺千戶
王均諒被執不屈蜀人磔之于文州東門初顯忠領
士卒七百餘人及城破僅二百人旣而友德調兵來
援世貞棄城遁去事聞使祭顯忠均諒厚恤其家

南陽衛指揮僉事郭雲傳

實錄

郭雲南陽人身長八尺姿貌魁岸膂力絕人元季聚鄉人爲義兵保裕州泉白寨累官至行省平章政事及元主北奔中原悉下獨雲堅守裕州屢出戰不降大將軍徐達遣指揮曹諒圍之雲復出戰敗披擒楊罵求死不少屈達壯之繫送京師既見上觀其狀貌奇偉命釋之時方閱漢書問之曰汝識字乎曰識遂以書使之讀雲誦其書甚習上大喜且以其忠義仍加賞賜授溧水知縣民咸稱之上益以爲賢特陞南陽衛指揮僉事俾還鄉收故部曲就戍其地

續通志卷之二十一

三九

兵民樂業至是病卒其長子洪武十三年上特命
為飛熊衛指揮僉事

宣武將軍僉留守衛親軍指揮使司事楊公信

續志

宋 濂

公諱信姓楊氏世爲開封鄆陵人在元時以膽畧聞
選充湖廣砲手翼百戶戍鎮江元末四海大亂天兵
定建康江南州郡莫不震動歲丙中公帥師旅來歸
命仍領銳手軍從征常宣二州有功權授親隨帳前
萬戶扈從取婺州奪城門懸橋復隨大將取三衢繼
又扈駕親征九江南康等郡下之實授管軍千戶及
陳友諒來南昌上怒下詔親征公帥銳手軍以隨
從戰彭蠡湖及陳友諒戰沒遺孥假息武昌公又從

破之既而克合肥援安豐拔永新亦與有功焉張士誠據姑蘇常忠武王秦詔致討公又從戰有功賜以文綺三皆有副陞虎賁左衛親軍指揮使司事出戍蘄州遂轉僉蘄州衛指揮使司事階宣武將軍調戍武昌遷永州已而遷永州衛指揮使司事俾其子孫世襲其職洪武八年冬十一月詔還京九年春二月改僉留守衛親軍指揮使司事散官如故夏五月七日以疾終享年五十又七其子觀音保始三歲二女幼上聞之惘悼不已特遣內臣祭以牲醴且勅中書大都府御史臺次第致奠復命工部造坐聚寶

山之原以其月十九日葬思意甚渥也惟公幸際興
王之運臨敵不憚故能立顯功受榮爵沒且不朽豈
非奇男子哉玄堂有誌今不敢廢也於是乎書

建寧右衛指揮僉事贈福建行都司都指揮僉

事徐公義墓碑

楊榮

洪惟聖明誕膺天命一時豪傑雄勇之士雲和景從相與經營四方遂成大業若故明威將軍建寧右衛指揮僉事徐公義者和州人也裔出栢翳歷世以來代有顯官至元季公之父曰壽才畧過人輕財重義賑濟貧乏有若渴饑及兵興遠邇騷動公父子俱處兵間初從平章也先帖木兒後因靖海侯吳公來歸相率渡江克太平定建康授領萬戶軍嘗以力戰創甚命公代之撫其背曰繼吾志者汝也蓋公爲子

第時嘗慨然有大志不營志產業剛毅正直膂力過人好讀孫吳書意有所合則撫卷而喜平居以騎射擊劔爲樂至是代父戍守江陰施設布置人咸異之吳元年從征僞吳張士誠每戰能躍馬揮刀作虎吼突入其陣衆皆披靡決戰之際雖矢石交集血流至踝弗顧也卒成其功繼克明州福城延平還定昌國拔蘭秀二山洪武元年授昭信校尉江陰衛百戶三年陞武畧將軍汝寧衛副千戶從信國公克瞿塘進虜蜀五年復從岐陽王北征沙漠公奮勇深入擒獲甚衆然不妄殺掠所至之處人多歸之無不愛之

若父母焉又能撫恤士卒與同甘苦故得其死力而
功能益著十一年授明威將軍建寧右衛指揮僉事
號令整肅權禦有方繕修力役勞逸適均人心悅服
二十一年春得疾甚劇卽却藥曰死自有命豈醫藥
所能療耶顧其子信曰汝等當忠以事上正以率下
勇以禦敵仁以撫衆則臣子之道盡矣言訖而逝其
生巳卯終於戊戌享年五十

留守右衛指揮僉事趙諒

忠節錄

趙諒鄂國公外孫其母與孝康皇后兄弟也壯勇知
兵建文初以諒爲留守右衛指揮僉事信任之諒能
效職無私交未逾月靖難兵起諒時時奉密命往來
諸將軍中覺察之靖難後諒坐廢死

海南衛指揮僉事柴公英墓志銘 王直

明威將軍海南衛指揮僉事柴公諱英字仲實堯之
曹縣人父諱清妣王氏父諱裕元季爲安豐奕千
戶率衆歸 太祖常從征伐積功至武節將軍正千
戶洪武初守番賜卒焉而公年且長矣入充叅侍舍
人以材武稱遂築爲瞿唐守禦正千戶從征遼東功
居多調浙之松門又調臨山乙亥秋詔天下武臣或
其父祖與開拓之功者皆超擢於是公得海南衛指
揮僉事寬厚愛人善於撫御剷弊興利人皆便焉黎
寇王瓶投澄邁公勦平之既三年授公明威將軍而

以官贈其父封母薛爲太恭人妻王氏封恭人永樂
丙戌朝廷以安南黎氏父子不道興師討之今英國
張公時爲新城侯實總戎事公以選拔在行謀報黎
氏柵富良江以自固師次駝海張公令軍中造小船
舁以行至富良江聯爲浮梁且楫之以濟公及軍中
驍勇者先登拔柵轉戰至東都覆其國安南次第平
論功行賞有白金文綺寶鈔之賜公屢立奇績皆有
文符當得陞公退然不自言識者比之馮異廣東瀕
大海海外諸國皆內屬然卽夷雜種時出沒寇海上
已丑春指揮李珪總兵備之聞公名徵以自助其所

以鎮撫扞衛多公策久之珪召還廣東都指揮司奏
公代領其衆詔從之公統兵萬餘巨艦五十艘諸將
有位在公右者皆服屬聽指使晝夜巡邏閱習訓練
如寇至寇亦聞公名不敢近海道幾萬里其民安生
樂業者皆公之惠也師駐潮州海門千戶所之前漕
得風疾以卒將士莫不垂涕相與具棺斂使其帳下
昇歸走五千餘里至海南海南軍民無少長悉良皆
奔走弔哭嗚呼此可以觀公之德矣公忠厚謙慎色
溫氣和持已甚嚴而待物甚恕征安南特部曲有得
婦女者擇以獻公公閉之一室使治女紅及歸以給

無妻者不留一人嘗道過南昌府同行者欲置酒命
妓爲公歡公知之乘夜先發其以禮自持類如此

燕山左護衛千戶倪諒

忠節錄

倪諒燕山左護衛千戶建文時上變告府中事逮府中官校于諒周鐸等皆伏誅沒產靖難後捕諒不屈死之

武畧將軍南京廣洋衛副千戶劉公倉墓碑

呂 枏

公姓劉氏諱蒼字伯春饒州安仁人也先世南陽泉
人宋有春山先生者諱子春官至睦州知府尚郡主
趙氏生二男子曰常卿正卿開寶八年常卿爲興安
監鎮正卿與俱來居安仁遂爲安仁人正卿生國貞
國貞生芳淑芳淑生通甫通甫生克明克明字直直
生泰泰字俊康洪武中帥萬人來歸 高皇帝授萬
戶侯改山西朔州衛正千戶生孟庸孟庸生孟惟俊
孟惟俊卒孟庸嗣其官未幾以罪失之其子甫復奮起
武功官至

南京鷹揚衛後所副千戶甫字子紱有勇畧然無子也於是孟雅生子仲翹輔翼及壘補翼之官稱鷹揚君云鷹揚君娶安仁孫氏公未久而鷹揚君卒故公九歲來自安仁嗣其官然輒端重英敏超越行輩十歲入武學學焉卽身自刻勵不煩督獎每赴演武教塲夜四鼓起讀將鑑一篇塲中鼓嚴乃進食食且惡必盡三四器乃上馬去返越午矣不食於市家人詰之則對曰一人之市食一家之日食也身通小學四書史畧七書將鑑諸籍又能爲宋趙孟頫書吳英者指揮也廉甚不苟取儼公其同志也學且優焉有

公一
時文
增其
奇竹
淨林
子也

緩義輒叩門以請遂爲莫逆交及公子麟舉進士謁
英英呼之曰子勿學他貪墨者以隕爾父之志否雖
官至卿相英不願見也初公雅好儒學而職事不遂
謂麟曰夫讀書可以建功業濟斯民吾已矣小子其
敏之於是有趙經先生者亦千戶也明經而習舉子
業然遵禮尚志旬月之間不越戶閫篋中藏二青布
袍必祭先壽親訪賢也沐浴而後着之卒事猶藏焉
公以爲賢遣麟師事之然無以贄也每獲折俸布帛
以布白衣以帛贄先生先生以麟貧不受公曰不貧
無以遺吾子也必贄之指揮龔海甘貧自守行年七

子好學不倦謝政閉門旁開小戶自搗藥以賣其價
不二然好誦孟子或從趙先生講焉趙先生後進也
輒正講席而後旁聽之戚黨有爲卿相者還龔將改
服以謁聞其載寶而還也遂絕跡不往或怪云此其
門其少龔海者之足哉海死而子勲守學不改人以
爲海未死也夫龔氏父子其介若是不可犯也獨于
公終始敬重不衰公嘗及察家伐冰入凌室一士凍
餒跌仆冰間羣士載冰爭蹂躪其上幾死矣公力闢
羣士解紳挽出土得不死當是時也趙端者覘之心
直其行遂納交焉趙端者趙經先生之父也年且七

十又尊行也而又敦廉尚義不妄與人遂呼公爲兄弟云一日攜公至其家命家人具饌以食公家無具移時不至公退端責其子經曰劉伯春予所畏服者也非他人比今乃不能令我完一雞黍約邪取大杖杖經且令其出妻時麟方學於經奔告公公趨至趙氏曰朋友與家室孰重假令經出其妻再娶弗賢令爾此孫不立若何趙怒方霽乃令再具饌歡宴而罷嘗有納戶起解千金取回關單誤遺道路公曉行獲焉日候其處三日矣一人頓足撫胸叫號而來曰天乎何殺我之酷乎公趨而問之人告之故公出單與

之其人頌首曰公德生我矣酬以數金笑而不受公
自少嚴正自持非其人不交常自悼職事之卑當其
志謂可樹大勲以自振也遂亦以是訓麟故賓客來
謁公者非其人麟不出見後公年過五十而麟守訓
益堅公又懼麟之絕物也命改之而麟已不能矣然
麟既舉進士而公猶未請老乃遂與職事安或於公
是前而非後然考其學力所至當非其熟邪初成國
莊簡公知公懿德選寘幕下居十餘年忠敬彌篤莊
簡公滋賢之遇以殊禮奏調廣洋衛右所軍政莊簡
公薨後成國繼之恩禮益加焉年六十詰封武畧將

軍又數年乃老正德辛未年八月十日卒距生正統
甲子年二月十三日壽六十有八歲子麟舉弘治壬
子鄉試丙辰進士歷刑部主事員外郎郎中出知紹
興府劉瑾用事時罷去紹興紹興人立去思碑瑾誅
詔起知西安府吏靜民懷未幾奔公喪解任服闋再
陞陝西參政云嗟乎孔氏之學不明久矣世儒博物
麗辭爲之雖力干祿則邈求道則遠則古之所謂異
端者今豈獨楊墨佛老哉悲夫然而天命在人未嘗
絕也故夫齊民武士於儒者甚眇焉然就其氣質所
至反有合於道者觀劉廣洋公及其諸友使受教孔

門安謂其不能升堂也惜矣乎然則學者欲自愛者
其知所先乎

王千戶業傳

劉儼

侯諱業字時泰姓王氏王先高郵興化人曾祖祥元
季從軍浙西國朝兵下臨安祥率先歸附授仁和衛
副千戶再調守禦吉安和斌父成世其職侯體貌豐
偉明敏多才幹幼從戴雲朋學書過目卽成誦能盡
得其旨要年十六父喪明年襲職京師適車駕北征
例當扈從侯在軍中動循紀律而勇畧過人同事者
皆驚異之曰南人少年能是乎旣凱還復任吉安時
年雖少而言動若老成人遇當爲事慷慨無所顧避
雖專督屯事而所之政務咸咨焉境有急必以屬侯

梅花洞寇作僉議曰彼恃險爲亂攻急則退不與戰
緩則肆非侯莫之能平侯往未踰月果平之永豐大
盤山賊首曾子良聚衆劫殺勢甚盛將及於縣縣遣
人告急郡守陳公本深謀於侯侯知守意欲以屬已
乃奮然曰兵固不敢擅調然民患之急如此可坐觀
乎古有先發後聞者我其行矣卽日選精兵二百餘
人倍道以行或諷其急侯曰彼賊烏合之衆耳計無
所出若少緩則有備兵法各有所用也侯果卒至逼
其營壘賊惶懼出戰一鼓而勝之大盤平事聞陞侯
本所正千戶拜恩感激益精熟武經諸書練習士卒

以求報稱既數年閩浙寇起朝廷遣大將寧陽侯往
討之吉安軍當調侯統以往從都督劉某殺丁公崖
賊侯常事先鋒大軍潰而侯之軍獨全常竊嘆曰吾
不得用其知而徒制於人上不能爲朝廷殺賊下不
能爲生民除害何以名爲人臣哉故以是不得論功
陞賞侯爲人輕財好義遇賢士大夫傾竭無所惜居
家孝於親友於弟妹仁於妻子其接人恭而有禮其
御士卒嚴而有恩驍驍乎大用而大胡及焉蓋年四
十有九娶周氏子二人長曰昭次曰耀昭敦厚有知
略以廕補父官侯卒之二年昭比試京師以于家食

時爲侯故而好又史官職紀載屬傳其事遂爲書之
使後之欲知侯者得以考覽焉

贊曰士懷抱利器將欲有爲而未試固可惜其有試
而驗矣乃不得究其用尤可惜也公於閩浙之寇與
梅花大盤如拉朽然使得提數十萬之衆用其知破
閩浙又安知其不猶拉朽哉乃困於不用徒飲恨而
無以自見繼是而後使天假之年以圖後功庶乎收
之桑榆也而竟止於斯於乎王侯命已夫

縛虎篇遙贈劉千戶伏玘

楊名

大同有叛卒姓王氏以行行人稱曰王三其人驍勇
有弄弄風且多智畧嘗鼓衆殺主將避罪竄投胡虜
酋長疑不錄約必殺其妻子示信遂歸鳩母及兩妻
火其居爲不返計酋長契之禮爲上符封以數千戶
俾統健卒獵漁中國庚子迫太原辛丑復長驅深入
榆次交城文水平定岢石諸郡邑重罹荼毒壬寅癸
卯時出時入惡焰熾空閒者戰慄至甲辰秋突入紫
荆直抵定縣京師戒嚴天子震怒用論者言械繫
請撤戍卒御史中丞朱公方併罪總督大司馬翟公

鵬及地方將官有差大司馬毛公伯溫以不能先事禦防且輕信中丞言罷職方郎韓君昺廷杖且死詰其原皆王三之導賊運籌流毒至此乃大懸賞格

帝命若曰蠢爾叛卒悖逆不道上殺主將下戕良善罪不容誅竄投胡虜引連兵馬蹂躪中原法難輕宥凡我將領有能善謀奮力激發忠義生致闕下者予千金陞官五級世世繼襲命旣下大同軍舍劉伏玘雅擅謀力又曩與王三善白之父母妻子曰我家世食祿無分寸報王三匹夫敢爾作孽使中土不寧戮此妖醜非伏玘不可請以死從事其母泣止之不從

復曰父雖老吾有三子大者例當優卹死不負父
母遂攜其妻女毅然就道留三子于家既至關口以
釀酒爲業居將一年踪跡王三無所得志不少懈乃
王三果來跨馬執戈弓矢在櫜從四小虜按轡闕下
問戍卒曰誰在此戍卒以劉二應聞言甚喜令速趨
會伏玘遂攜壺榼出下馬相見執伏玘手曰弟何爲
在此伏玘曰貧甚不能自給寄此釀酒意得升斗爲
活計不圖今日乃見兄也涕淚交下王三懇慰之曰
弟無慮予今富貴若此忍使弟流落乎他日得志當
以國卿第處爾也伏玘斂泣酌酒爲壽王三傾之不

疑伏玘志定已久酒皆宿儲麴孽既厚復投藥毒王
三纒數盞卽覺微醺喜謂伏玘曰吾欲至爾旅舍少
坐伏玘佯辭不能爲歛曲王三固請以行至其舍相
勞苦備至且請見伏玘妻與女問其三子伏玘曰留
待吾父母王三大呼伏玘妻曰二嫂取好酒來吾弟
兄叙闊懷以盡醉爲期因命小虜出數金以遺之伏
玘妻亦善應對踞獻數巨觥已伏玘與王三對酌其
妻出禮小虜不計壺盞數日將夕王三醉甚四小虜
亦醉甚偃臥舍中數試之不覺伏玘乃與原同約三
卒用大椎椎其兩臂臂痛但矐目強視曰爾何擊予

也予明日赤爾族振不能起兩臂既斷縛以一已繩載
至總戎所覆覈無僞檻詣京師 帝心大悅下法司
議罪當凌遲俾傳首九邊以懾諸虜如其賞格賞伏
現千金官授正千戶同事三卒各百金官爲百戶在
完縣虜衆聞之星散將士奮力殲甚多事傳至蜀
方洲子不勝欣嘆夫自虜以來所傷數百萬命所費
數百萬金曾無一勝以答衆望而伏現小臣捐身赴
義克擒渠帥以奠邊危可不謂忠且智乎一時居將
領者可以自省矣作縛虎篇以遙致相慶之意或足
以風于衆也京華直北兩巨鎮大同宣府相爲命地

勢遙懸諸虜陣關門直與七陵近中有點虎名王三
力能舉鼎性貪婪首倡叛逆弑主將却以虜窟爲龍
潭酋長見之疑不錄鴆母兩妻証心腹獵將恩寵如
上賓授之軍騎任馳逐一薄太原藩鎮輕再入平定
幾輔驚三衝紫荆踐完縣千兵萬馬恣遊行京師戒
嚴 聖心怒兩鎮將領充荒戍司馬休官職方殂大
懸賞格勤招募大同軍舍劉伏玘心最忠義真男子
平生欲勒燕然銘祝賊若仇執以死父母泣號苦莫
留提刀誓斬逆臣頭世沐主恩司部伍安能坐待身
封侯獨攜妻女寄關口汲水負薪自釀酒酒成日飲

數十人王三不來日已久甲辰之秋賊惡盈持戈跨
馬衝邊城入關忽聞故人在相逢勞慰傾真情劉家
二嫂最恭謹跪進醪醪望接引探髮取金爲嫂壽弟
唱兄酬天欲瞑喜極飲多成巨酣解甲長臥毛鬣鬣
數回動搖漫不省推殘兩臂縛之檻羽書馳報天
顏喜磔屍傳首示邊鄙十萬胡兵盡夜逃俘獲備載
歌聲起劉郎奏見承殊恩千金五品貴且尊名姓分
明著國史氣焰烜灼歸轅門向日當墟真獨苦筭策
無遺縛點虎縛虎弗克儻返噬甘爲齏粉竟何補嗚
呼丈夫不遇時屈身降志同愚癡一朝得意便卓絕

回視瑣瑣皆塗泥君不見五府侯又不見九邊將錦
衣廩食行呼唱幄中籌略今何如後來誰畫凌烟上

衛鎮撫徐讓

忠節錄

徐讓爲山西布政司理問材氣磊落有口辯建文時
應募齋書物至北平議和解兵受而不荅還授衛鎮
撫軍前差遣戰歿

衛鎮撫衛健

忠節錄

衛健爲山西孝義縣丞讀書達吏事膽智過人建文時與徐讓同應募至北平還投衛鎮撫與讓並赴軍前差遣戰歿

焦太史編輯國朝獻徵錄卷之一百十一終

獻徵錄

卷之一百上

四十九